

Lepran De Pool Ran Nen Kolosi Mo

¹ Lepran desə nə put a nsar mənə Pool de Naan wu kə ten bələp nghan mbəkə nghan tong de a laalep nJesu Kristi, kə Timoti dyemnəən fun ndəən Kristi.

² Dəm pee nen Naan de mo ndəən yil nKolosi, pee dyemnəən fun mo de mo balkaa fur mo ashak kə Jesu Kristi. Deret kə Naan puun fun kə tongryang fin dee ashak kə wun jir.

Pəlang Kə Dangnaan

³ Muu chìn dangnaan nNaan mbe wun shidaar-shidaar. Kəzak, muu naa pəlang Naan de wu a puun kə Daa fun Jesu Kristi.

⁴ Mbəde mu kələng nə, shinzeen fuu ndəən Jesu Kristi nii sekyeen, kəzak nnə, wuu wal nen kə Naan mo jir.

⁵ Mbəde wuu le pətuup nkaa mbii de Naan wu kə ten dak nə le ndəən dengnaan, Wu kələng pwoo nkaa mbii desə mo a ndəən pwoo deret de nə azeen de di wuu ten wu kələng nə.

⁶ Pwoo deret desə nə, nən nkaa mwan dəm shipee-shipee ndəən yil desə. Nii shin ciir kə pətuup gurum mo, dangbe nii le kə mo chìn dak deret mo. Yaksə, gurum mo des, mo nkaa shinzeen dikə-dikə. Nə aasə, be nə kə dəm wul mpee fuu, dangbe nə nkaa ciir kə pətuup fuu mo, mbəkə wun chìn dak deret mo de. Yaa mparpuus de di wu shee kələng nə, be yaksə wu manshii

kə nə azeen-nzeen, kaadi Naan wur le deret nkaa wun sə.

⁷ Wu shee kələng pwoo deret desə, a mpwoo kə Abafaras, de muu wal nwur, dang wur a shaardak fun. Wur cìn dak kə Jesu Kristi shi pətuup məndong nnaar fuu a koppee fun.

⁸ A wur sat mmun pwoo nkaa nwal fuu ndəən Riin Debang.

⁹ Nə aasə, be yool mparpuus de di mu kələng pwoo mənə nkaa wun, be muu dangnaan(leshap kə Naan) (leshap kə Naan) mbə wun shidaar-shidaar. Muu dang pə Naan, mbəkə wur gam wun de seen mə man d̄yen fen, man de nə put a pee Riin wur jì d̄i.

¹⁰ Man mənə le, kə mwaan fuu mo lapshak kə mə nen de mo dəm ndang Jesu. Mwaan de nə tong d̄yen n̄Jesu. Katdang wu mwaan a ndəən d̄yen Jesu, be məse fuu nən nle kə wu chìn dak deret mo, kə wu sat a nwurang ndəən man pwoo nkaa Naan dak.

¹¹ Muu dangnaan (leshap kə Naan) nə, Naan d̄ewur bal met jir, wur nshínbal nwun, mbəkə wu d̄ar de balbal ndəən mbii mo jir. Kəzak, koo de a me cìn yi, be nwun sat a ngung de dak, kə nwun kat retnyit d̄i zak.

¹² Wu pələng puun fun d̄ewur adeng, wur d̄ewur wang ar nə mmun, mbəkə mu sekop fen de ashak kə nen fin mo ndəən pee d̄ebang.

¹³ Wur put kə mun ndəən iiko mu peenkoo, dangbe wu waa mang mun d̄el kə mun ndəən mulki kə L̄aa fin.

¹⁴ A L̄aa fin, wu ang mun, de nə kam nə a wur fwo shikbish fun mo mmun.

Jesu Kristi Kə Dak Fin

¹⁵ Baa mee gwar kə cam naa Naan kas, amma gurum mo kə naa Jesu de wu lapshak kə Naan. A wur kám tong kə Naan mmun agaak. Jesu wur a Laa Naan denshee, dewur met mbii de Naan wur le mo jir.

¹⁶ A ndəən Jesu, be Naan wur le mbii de mo ndəən yil nə jir. Mbii de mo ndəən dengnaan kə de mo ndəən yil desə. Mbii de gurum moo mak naa mo, kə mbii de baa gurum moo mak naa mo kas. A ndəən dedes wur, be Naan wur le mbii de mo kə iiko ndəən dengnaan. Mbii denan mo kə dedyeen mo nciit-nciit kə bal fur mo. A ndəən Jesu, be Naan wur le mbii mo jir, kə mbii mo jir, a Jesu wu kə mo nsar, be mo a mu wur jir zak.

¹⁷ Pəgyet de yam-yam, be Jesu wur de, akudang Naan wur le mbii mo ndəən yil nə. Naan bəl mbii mo jir ashak a ndəən Jesu.

¹⁸ nDəən nen Naan mo, be Jesu a káa mo. Koor gurum nə mo a foshik wur. A Jesu a káa mə nen dəm ndang Naan mo. A wur a denshee, zak, a wur shee yool a peemúut. Mpee mbii desə mo, be a wur a denshee ndəən mbii mo jir.

¹⁹ Nə ret nNaan nyit, be wur le kə dyen fen nə gam, kə nə tong ndəən Jesu.

²⁰ Nə ret Naan nyit zak, mbəkə wur waaji kə mbii mo jir pə shin di ndəən Jesu. A ndəən toom de Laa kə Naan wur beer nkaa shiyeepyoom, dangbe Naan wur rəbet waa baaji kə mbii mo jir, pə shin di. Mbii de mo ndəən yil desə, kə de mo ndəən dengnaan.

²¹ Di mmee nnaar, be wuu tong a jong-jong kə Naan, kə di wun a shaarlek Naan, mbə mbii

debish, de di wuu cìn mo, kə pan fuu debish mo.

²² Amma yaksə, mbə muut Lāa Naan, de mo lāa wur ndəən nan, be Naan le kə wu dee a shaar fin mo, mbəkə pətuup fuu mo dee dī a debang, kə mbəkə wur jì kə wun de ntoom Naan, dewur a debang.

²³ A mbii de Jesu cìn nwun mmənə, katdang wu sekyeen kə shinzeen ndəən pwoo deret nə. Kəzak, katdang wu dar balbal ndəən mbii desə mo. Wu sat a nlepətuup, nkaa mbii de wu kələng pwoo nkaa mo ndəən pwoo deret nə. A pwoo nkaa pwoo deret, de moo ten sat nə nkòo a weyi, ndəən yil desə. Wen Pool, dak fen nə a mbəkə nghan sat de ngurum mo, pwoo nkaa pwoo deret desə nə.

Dak De Naan Shin mPool

²⁴ Kaade wen nkaa shwaajeel mbə səm fuu, be nghan kə retnyit mputuup. Kaade gyet Daa Jesu shwaajeel sə, be wen zak, kən shwaajeel ndəən nan mbə səm kə nen fin mo de mo a fwooshin fin. Wen shwaajeel nə a mbəkə wen sət nkyes koor dak wur nə dī.

²⁵ A Naan wur bələp nghan, mbəkə nghan dee dī a kərem mə nen kə Jesu mo, be wu le dak desə nə nsar fen mbə səm fuu. Dak de wu le nsar fen nə, a mbəkə nghan satpwoo fen deret de ngurum mo kədəng.

²⁶ Pwoo de wen kən sat ngurum mo, be gyet yam, be nə a de səsok. Mbəmənə be baa gyet gurum mo manshii nə kas, amma yaksə Naan woo mmun agaak nen fin mo.

²⁷ Nə ret nNaan nyit, be wu le, kə nen fin mo manpwoo dejurum desə, de nə a mbii aapwoo zam. Nii koop nə hakyeng, mbə gurum mo jir,

koo a ndəən yil dedangyi. Pwoo dewur woo nə mmun, a nə, Jesu Kristi wur tong ndəən wun. Mbəmənə, be wu lepətuup, mbə parpuus de wun ntong ashak kə wur ndəən ram fen.

²⁸ A mbəmənə be muu satpwoo ngurum mo jir nkaa Jesu Kristi. Muu satpwoo nkòo a weyi, kə wur tap, kəzak, muu kám seen ngurum mo nkaa mbii desə nə mo, a mbəkə koo a weyi, be wur dee de kə seen ndəən Kristi.

²⁹ A mbəmənə, be wen kən cìn dak shibal de Jesu wu shin nghan, dang wen kən gung mbəkə nghan kyes dak desə nə di.

2

¹ Dyen nghan, kə wun man dak de nghan kən gung mbe cìn nə mbə səm fuu, kə mbe nen de mo ndəən yil Lodisiya, kə jir nen de baa mo kə cam naa an kas.

² Wen nkaa cìn dak desə nə, a mbəkə mo katbal de mputuup fur mo, mbəkə mo wal de nshak, mbəkə mo dee de a deməndong. Dyeen nghan kə mo man jurum kə man nkaa Jesu hakyeng nə kyeet, mbəkə mo manshii kə mbii desə mo de jir. Desə nə nji kə deret nkaa mo hakyeng. Mbii dejurum nə, a Kristi shikáa fen.

³ Mo sok long mə seen kə man mo jir, a ndəən Jesu.

⁴ Wen kən sat mbii desə mo nwun, a mbəkə taji mee gurum ngwom wun shi liispwoo de nə shangkəlong kas.

⁵ Koo dang de baa wen ashak kə wun ndəən nan kas, be nghan de ashak kə wun ndəən riin. Nə shang nghan zam, kaade wen nnə kəlong nə, wuu

cìn mbii mo a nciit-nciit ndəən ar deret, kəzak, wuu ɗar balbal ndəən shinzeen fuu de nə ndəən Kristi.

Seen De Gam nDəən Kristi

⁶ Kaade, wu mang Jesu Kristi kaa Daa fuu sə, be nə ret kə wu mwaan-mwaan de nə ret kə nen de mo balkaa fur mo ashak kə Jesu, moo cìn. Wu tong ndəən wur.

⁷ Wu sham seen fu mo nder-nder ndəən nwur, wu ɗyik seen fu mo kaa wur, kə wun ɗeng kə bal ndəən shinzeen nwur, kaade mə kám nwun sə. Kəzak, wu pəlang wu shidaar-shidaar mbə mbii mo jir.

⁸ Wu tap, taji mee gurum ngwom wun shiman mə yil ɗesə, mbəkə wu taa wu mer de a ar deret nə kas. Kyaan kə man de nə put a ndəən wàar mə gurum mo, kə ndəən riin ɗebish mə yil ɗesə, baa nii put a pee Kristi ɗi kas.

⁹ A ndəən Jesu, be muu naa gam kə ɗyeen Naan, kə tong ndəən nan nə zak.

¹⁰ Mo shin seen nwun, a mbəɗi wuu balkaa ashak kə Jesu. A wur a káa kə mulki kə mbal mo jir.

¹¹ A ndəən wur, be mo can wun, baa a can de moo cìn shi sar ndəən nan kas, ɗangbe a can de Jesu Kristi wur cìn nwun de nə put kə wun ndəən shikbish.

¹² Kaade gyet mo cìn baptisma nwun, mbe mo wum wun ashak kə Kristi, ɗangbe mo waa yool kə wun ashak kə wur a peemuut.

¹³ Gyet yam be wun a demumuut mbe shikbish fuu mo, kə baa gyet wun a nen Naan mo kas de baa moo mee waar kas. Ɗangbe Naan shin

seen nwun ashak kə Kristi, kəzak, Naan kə fwo shikbish fun mo jir.

¹⁴ Gyet yam be mun a demumurep mo nder wàar mə Naan, mbədi baa gyet muu cìn mbii de wàar kə Naan nə sat kas. Dangbe yaksə, Naan wur mang shikbish mənə mo baa kənə aku nkaa káa fun mo, kə wu fwo de mmun jir zak. Mbəde gyet mo pwas Jesu Kristi nkaa shiyeepyoom, a mbe shikbish fun desə nə mo.

¹⁵ Kaade gyet Jesu Kristi muut nkaa shiyeepyoom, be wur se koorong nkaa riin debish mo kə iiko mo, wur kám ngurum mo a agaak nə, wur bal met mmo jir.

¹⁶ Mbəmənə, be taji wu yit kə mee gurum lewàar nwun nkaa mbii de wuu se, kə shwaa kas, koo nkaa puus debang mo, koo nkaa mbii de wuu cìn mo, mbe tar depwoo, koo nkaa puus Nookdi.

¹⁷ Mbii desə mo dee a mə riin, de gyet moo kám ngurum mo mbii de mo pə jì akyeen. Mbii de gyet moo dee a mə riin desə nə, moo gam, a Kristi shikáa fin.

¹⁸ Mbəmənə, taji wu yit kə nen de mo lesut a kaa nendenan mo sə, mo tokɔyeel debish nwun kas. Nen de mo sat nə, Naan kə woo mbii mo nwudun zuum. Mo sat nə, wu sham kə káa fuu mo mə dung, kəzak, nnə wu seyil nenlep Naan mo. Nen mənə, moo roop, koo de baa mo a mee mbii kas. Pan fur mo a mə yil desə.

¹⁹ Baa moo rəbet balkaa fur ashak kə Kristi de wu a káa mə nen mwaan ndang Naan nə mo kas. De a wur shínbal mmo, dang a wur shin mbiise mmo zak. Jir nen de moo balkaa fur mo ashak kə Jesu, be wur kə shínbal mmo, mbəkə mo jì de ashak zak. Kə mbəkə, mo wurang de a ndəən mbii

de mo a mə Kristi, kaadi Naan wur rəbet sə. Beep mə fwoshik fun moo kaat shishak, mbəde mo kə peebal mo, kə paar mo. Nə a kaadi Kristi wu bəl nen mwaan ndang wur mo, de mo a shin fin sə.

²⁰ Kaade wu murap ashak kə Kristi, be baa riin de mə yil desə mon nkat bal nkaa wun kas. Dangbe a me le dang wuu sekyeen kə mwaan kaa kor gurum de mə yil desə mo yi? A me le dangbe wu cínkáa fuu nder kə wàar de gurum sat nee, wu cìn yi

²¹ Kaade moo sat nwun nə, taji wu tung mbii desə shi sar kas. Taji wu se mbii desə kas, kəzak, taji wu tung mbii desə shi sar kas.

²² Kyaan kə wàar desə mo, mo a kám mə gurum. De katdang mo gung cìn dak kə mo, be mo dee a debuu.

²³ Wàar kaa desə mo sə, mo kə lapshak kaa mo aa mee koop mə seen sə. Mbedi wàar nə mo letəng ngurum mo, kə mo seyil de ndəən ar deret, kə mo sham kə káa fur mo, mə dung zak, kə moo shínjeel de nsut fur mo, dangbe azeen-nzeen, baa moo mee koop nə kas, mbəde baa moo mee bal de mon mbam gurum, mbəkə wu tap de nə coor mə nan nə kas.

3

Seen Depwoo nDaan Kristi

¹ Mbəde mo kə yool kə wun ndəən seen ashak kə Kristi, mpeeməne, be wu le pətuup fuu mo nkaa mbii de mo ndəən dengnaan, a peedi Kristi wur tong de, nsarse kə Naan.

² Wu lepan fuu mo a nkaa mbii de mo adeng. Taji wu lepan fuu mo nkaa mbii de mo ndaen yil desə kas.

³ Mbedi wuu murep, dang be seen fuu depwoo nə mo a səsok pee Kristi de ndaen Naan.

⁴ Katdang Kristi dewur a seen fuu, wur ji put, be wuwun zak, wun mput ashak ka wur ndaen dehai fin.

Seen Desaar Ka Depwoo

⁵ Wu twe mbii de mo a mə yil desə, de moo cin dak ndaen seen fuu mo jir. Mbii kaa cin ngaa mo sə, ka mwaan debish mo, ka coor mbii mə nan mo, ka rabet mbii debish mo ka tələk, de nə a see nyil mee naan deci.

⁶ A mbə mbii debish kaa desə mo sə, be Naan wur woo tuup fin nkaa nenyil de mo cii kələng doo fin.

⁷ Gyet wun, shikaa fuu, wuu cin mbii desə mo, har gyet wuu mwaan a ndaen mo.

⁸ Dangbe yaksə, kaadi wun ka seen depwoo sə, be nə ret ka wu shwat sar fuu mo aku, ndaen mbii debish desə nə mo jir. Mbii mo kaa langtuup, pan debish nkaa shak, pwoo debuu nkaa shak, ka jir pwoo de baa mo ka mee koop nə kas. Taji wu baa wu cin mo de zak kas koo daben.

⁹ Taji wu cin dung nshak kas, mbəde wuu ten wu yit shiimwaan fuu de gyet yam nə mo di.

¹⁰ Mbəmənə wu shee shiimwaan depwoo de Naan wu le ndaen pətuup fuu mo, de nə ndak shiimwaan fuu mo, ka wu dee de kaa wu sə, mbəkə wu man wu dikə.

¹¹ Yaksə, baa mee shwatnyit de nnaar ka ngu Heleni ka ngu Yahudi kas, koo nnaar ka gwar

de moo can wu kə gwar de nsuluk kas. Nnaar kə nenseen mo, kə nenyil de baa moo seen kas, nnaar kə məzep mo, kə nenyil mo, nnaar kə kərem mo, kə jeplu mo. Yaksə be gurum mo dee a nciit-nciit, ndəən Kristi, mbəde wu met mbii mo jir.

¹² Taji wu muunshik nə, Naan wal nwun zam, har wur bələp wun, mbəkə wu dee de a nenyil fin mo. Nə a təng kə shiimwaan fuu mo ret, kaa jep Naan mo sə. Wu naajeel mə shak. Wu cìn mbii dəret nshak. Wu sham kə kaa fuu mo. Wu cìn mbii mo ndəən dyyen, kəzak, wu gung ndəən mbii mo jir.

¹³ Taji wu kəlak kə langtuup kə shak kas. Kat mee gurum cìn shikbish ngənəən, be gwar de mo cìn shikbish nə nwur, wu fwo de ngucìn shikbish nə. Daa Naan kə fwo shikbish fuu mo, mpeemənə, be nə ret kə wuwun, wu fwo dī nshak zak.

¹⁴ Mbii de nii koop nə met jir, wu wal, mbəde nwal nə kə bəl gurum mo ashak ndəən tong de mbii mo a dekəgam jir.

¹⁵ Wu yit kə tongryang mə Kristi, nə se mishkoom ndəən pətuup fuu mo. A mpeemənə be Naan wu pərep wun, mbəkə wu tong ndəən tongryang mənə. Wu pəlang Naan shidaar-shidaar.

¹⁶ Wu yit kə pwoo kə Kristi nə tong ndəən wun hakyeng, kaadī wu cìn kám, kə bəmshak ndəən seen de Naan wu cìn nwun sə. Wu kwoop Naan shi kook mo, kə kook de mo a mə Riin, de mo put ndəən pətuup fuu, de Riin kə Naan wu cìn wun. Kaade wuu koop Naan shi kook mo sə, be nə ret kə wu pəlang wu ndəən pətuup fuu mo.

¹⁷ nDæen mbii de wuu cìn mo jir, koo de a ndæen ðak, be wu cìn mo jir a ndæen sàm kə Daa fun Jesu. Wu pəlang Naan puun ndæen sàm fin.

*Ar De Nendəm Dang
Jesu Mon nTong Di Ashak*

¹⁸ Wun mat mo, wu shin dedes mish fuu mo, kaade nə ret kə nendəm dangnaan mo cìn sə.

¹⁹ Wun mish mo, wu nwal mmat fuu mo. Taji wu tong kə mo a shi lek kas.

²⁰ Wun jep mo, wu kələng pwoo puun fuu mo, mbəde mənə ret nNaan nyit zam.

²¹ Wun puun mo, taji wu le kə jep mo langtuup kas, mbəde kat wu le kə mo langtuup, be nə nroop kwak mmo.

²² Wun kərem mo, wu cìn mbii de nenlu fuu mo sat nnə wu cìn. Taji wu cìn mbii mo a mbəde moo naa wun kas, mbəkə wu kat deret de pee mo bejee kas, dangbe wu cìn mbii mo a shi pətuup deməndong, kə shin dedes nNaan.

²³ Koo dang de ðak fuu nə a meyii, be wu cìn nə shi pətuup məndong, kaade wuu cìn a nNaan sə, baa a mbe gurun mo kas.

²⁴ A Daa Jesu Kristi wu a Daa fuu. Wun nlap kwat fuu mo a pə wu de. Kwat de wu nshin nwun nə, a sekop de wu ðak nə le mbe nenyil fin mo ndæen dengnaan, mbəde ðak de wuu cìn nə, be wuu seyil nDaa Jesu Kristi.

²⁵ Ngwar de wu cìn mbii debish, be Daa wu nkwat gwar mənə a shi mbii debish, nciit-nciit kə mbii debish de gwar mənə cìn. Baa mee shwatyit de kas koo dəben.

4

¹ Wun nen de wun kə kərem mo, wu fwang mo ndəən ar deret, ndəən zeen zak, mbəde wu man nə, wun de kə mee gwar dedes zak, ndəən dengnaan, dewur kə fwang wun.

Mbii De Nə Ret Kə Wu Cìn

² Wu dangnaan(leshap kə Naan) shidaar-shidaar. Wu tong shi gongpee, kəzak, wu pəlang Naan mbe mbii mo jir.

³ Wu dangnaan(leshap kə Naan) mbe mun zak, mbəkə Naan wang ar də mmun, kə mu satpwoo fin de ngurum mo. Kə mbəkə mu yakshii nə de ngurum mo mbii de jurum, de Naan wu woo mmun nkaa Jesu Kristi. A mbe pwoo deret nə, dangbe nghan a shishoot ndəən lushoot.

⁴ Wu dang pə Naan, mbəkə nghan satpwoo deret nə de ngurum mo agaak, kə mo manshii nə di, kaade nə ret kən ghan sat sə.

⁵ Wu mwaan shi seen, pə nenyil de baa mo a nendəm ndang Naan mo kas. Wu cìn dak kə koo a pee dedangyi de Naan shin wun!

⁶ Wu yit kə liispwoo fuu mo shang kələng ngurum mo, kaa mbii də mo tap le kəən dike sə, mbəkə wu man mbii de wun nlap de ngurum mo katdang mo tal mee mbii pə wun.

⁷ Tikikus satpwoo nwun, nkaa mbii də an kən cìn mo jir. Wur a dyemnəən fun de muu wal wur ndəən Kristi. Wur kə cìn dak kə nendəm ndang Naan mo, a shi pətuup məndong. Wen kə wu, mun a kərem kə Daa Jesu ndəən dak fin.

⁸ Wen kən lep wur dəm pee wun dī, a mbəkə wur sat dē nwun mbii dē muu cìn mo jir, kəzak, mbəkə wu caa wun dī.

⁹ Unisimus dēwur a nguyil fuu, wur ndəm ashak kə Tikikus. Mon nsat nwun mbii mo jir, nkaa an. Unisimus wu a d̄yemnəən fun, dē muu wal nwur. Wur cìn d̄ak kə nen dəm ndang Naan mo a shi pətuup məndong.

¹⁰ Aristaakus dēwur a shishoot ashak kə an, wur kə tok kə wun jir. Maak kən kə Barnabas, wur kə tok kə wun zak. Wen kən ten ran pwoo nwun nkaa wur zak. Katdang wur dəm pə wun dē, bē wu lap wu shi pətuup məndong rəret.

¹¹ Joshuwa dē moo pet wur a Jastus, wur tok kə wun. Das d̄ekun sə mo, moo b̄am nghan zam. A mo a nen Yahudi dē moo cìn d̄ak ashak kə nghan mpeesə. Muu sat ngurum mo nə, Naan wu a mishkoom.

¹² Abafaras dēwur a ndəən wun, wur tok kə wun. Abafaras wu a kərem kə Jesu Kristi. Wur d̄angnaan(leshap kə Naan) m̄bē wun shidaar-shidaar. Wur d̄ang pə Naan, mbəkə wu d̄ar dē b̄albal, ndəən mbii dē mo a m̄ə Naan, mbəkə wu man mbii dē moo ret dē nNaan nyit. Kəzak, mbəkə wu kələng d̄oo fin dē, ndəən mbii mo jir.

¹³ Wen shikáa fen, nghan kən naa, kaadē wur cìn d̄ak b̄albal m̄bē s̄əm fuu wun dē wun ndəən Kolosi, kə bē nen dē mo ndəən Lodisiya kə Hirapolis.

¹⁴ Luka dēwur a nguyen, dē muu wal nwur zam, kə Dimas moo tok kə wun.

¹⁵ Wu tok kə d̄yemnəən fun dē mo ndəən Lodisiya, kə Nimfas, kə nendəm ndang Naan dē mo ndəən tul nwur.

¹⁶ Abwoon de mo kə tang lepran desə nwun, be wu le kə mee gurum tang nə ndəən nendəm ndang Naan de mon nLodisiya zak. Wu tang lepran, de nendəm ndang Naan də mon nyil nLodisiya mon nlep shiin ji nwun zak.

¹⁷ Wu sat Arkipus nənee, <<Wur kyes dak de di Daa Jesu Kristi Shìn nwur, mbəkə wur cìn de sə.>>

¹⁸ A an Pool ran lepran desə nwun shi sar fen. Taji wu muunshik nə, an a shishoot ndəən lushoot kas. Deret Naan tong ashak kə wun jir. nə aasə.

Manji Yiljep

Mupun New Testament

copyright © 2024 Initiative for the Translation and Development of African Languages and The Seed Company

Language: Mupun (Mwaghavul)

Contributor: Initiative for the Translation and Development of African Languages

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-03

PDF generated using Haiola and XeLaTeX on 3 Jul 2025 from source files dated 3 Jul 2025

77a1013c-7c23-599f-9af1-1adbfc09489